

# 中華禮藏

禮制卷

總制之屬

第四冊

禮

禮

# 中華禮藏

禮制卷

總制之屬

第四冊

## 圖書在版編目(CIP)數據

總制之屬. 第四冊 / 汪瀟晨, 周佳點校. — 杭州: 浙江大學出版社, 2017. 8

(中華禮藏. 禮制卷)

ISBN 978-7-308-17282-0

I. ①總… II. ①汪… ②周… III. ①禮儀—中國—古代  
IV. ①K892.9

中國版本圖書館 CIP 數據核字(2017)第 196377 號

## 中華禮藏·禮制卷·總制之屬 第四冊

汪瀟晨 周 佳 點校

出品人 魯東明

總編輯 袁亞春

項目統籌 黃寶忠 宋旭華

責任編輯 張小莘

責任校對 宋旭華

封面設計 張志偉

出版發行 浙江大學出版社

(杭州市天目山路 148 號 郵政編碼 310007)

(網址: <http://www.zjupress.com>)

排 版 浙江時代出版服務有限公司

印 刷 浙江印刷集團有限公司

開 本 710mm×1000mm 1/16

印 張 43

字 數 500 千

版 印 次 2017 年 8 月第 1 版 2017 年 8 月第 1 次印刷

書 號 ISBN 978-7-308-17282-0

定 價 300.00 圓

版權所有 翻印必究 印裝差錯 負責調換

浙江大學出版社發行中心聯繫方式: (0571)88925591; <http://zjdxcbbs.tmall.com>

於瘞坎。次引監察御史、大樂令、奉禮郎、太祝詣望瘞位，立定。禮直官曰：“可瘞。”奠土半坎。凡瘞，皆先省視訖，乃瘞。

引初獻以下詣卯階揖位，立定。禮直官贊：“禮畢。”揖訖，退。太官令帥其屬撤禮饌，引監察御史詣壇，監視收撤訖，退。

## 卷第九十六 吉禮

### 諸州祭嶽鎮海瀆儀

時日 齋戒 陳設 省饌 行事

#### 時日

太常寺前期以立春日，祭嶽鎮海瀆，立夏、立秋、立冬、土王日，並准此。關太史局。太史局以其日報太常寺。太常寺參酌訖，具時日下本州。立春日，祭東嶽泰山於兗州界，東鎮沂山於青州界，東海於萊州界，東瀆大淮於唐州界。立夏日，祭南嶽衡山於潭州界，南鎮會稽山於越州界，南海於廣州界，南瀆大江於益州界。土王日祭中嶽嵩山於河南府界，中鎮霍山於晉州界。立秋日祭西嶽華山於華州界，西鎮吳山於瀛州界，西海、西瀆、大河於河中府界。立冬日，祭北嶽恒山及遙祭北鎮醫巫閭山於定州界，北海、北瀆、大濟於孟州界。

#### 齋戒

前享五日，應行事、執事官散齋三日，治事如故，宿於正寢，不弔喪、問疾、作樂、判書刑殺文書、決罰罪人及與穢惡；致齋二日，一日於廳事。唯享事得行，其餘悉禁。前事一日質明，俱赴祠所齋舍。享官已齋而闕者，通攝行事。

#### 陳設

前享三日，有司設行事、執事官次於廟門外，隨地之宜。

前二日，有司牽牲詣祠所。

前一日，掌廟者掃除廟之内外。

享日丑前五刻，執事者陳幣筐於神位之左，祝版於神位之右，置於坫。

次設祭器，皆藉以席，掌饌者實之。左十籩，爲三行，以右爲上；第一行：乾榛在前，乾棗、形鹽、魚鱸次之。第二行：鹿脯在前，榛實、乾桃次之。第三行：菱在前，芡、棗次之。右十豆，爲三行，以左爲上；第一行：芹菹在前<sup>①</sup>，筍菹、葵菹、芹菹次之。第二行：韭菹在前，魚醢、兔醢次之<sup>②</sup>。第三行：豚拍在前，鹿膾、醢醢次之。俎二，一在籩前，實以羊腥七體，兩脾、兩肩、兩脇并脊，兩脾在兩端，兩肩、兩脇次之，脊在中。一在豆前；實以豕腥七體，其載如羊。俎六，在豆右，爲三重，以北爲上；第一重：一實以羊腥，腸、胃、肺、離肺一在上端<sup>③</sup>，剝肺三次之，腸三、胃三，又次之。一實以豕腥膚九，橫載。第二重：一實以羊熟，腸、胃、肺；一實以豕熟膚，其載如腥。第三重：一實以羊熟十一體，肩、臂、臑、肫、膈、正脊一，直脊一，橫脊一，長脇一，短脇一，代脇一，皆二骨以並。肩、臂、臑在上端，肫、膈在下端，脊、脇在中。一實以豕熟十一體<sup>④</sup>，其載如羊。皆羊在左，豕在右。簠二、簋二，在籩、豆外，二俎間，簠在左，簋在右。簠實以稻、粱，粱在稻前。簋實以黍、稷，稷在黍前。

設犧尊四、象尊四，爲二重，在堂上東南隅，北向，西上，犧尊在前，皆有坫，加勺、冪，爲酌尊。犧尊一實明水，爲上尊，餘實泛齊，初獻酌之。象尊一實明水，爲上尊，餘實醴齊，亞、終獻酌之。又設太尊二、山尊二在神位前，太尊一實沉齊，山尊一實醴齊，各以一尊實明水。著尊二、犧尊二、象尊二、壺尊六在堂下，著尊一實盎齊，犧尊一實醴齊，象尊一實沉齊，各以一尊實明水。壺尊三實玄酒，三實三酒。明水、玄酒皆在上。五齊三酒，皆以本處酒代。

① 底本“芹菹”後衍“箔菹”二字，據文津閣本刪。

② “兔醢”二字，底本脫，據文津閣本校補。

③ “離肺”二字，底本脫，據文津閣本、十萬卷樓本校補。

④ “十一”，底本作“十二”，據文津閣本、楊本、十萬卷樓本校改。

皆北向，西上，加冪。五齊三酒，皆設而不酌。

有司設燭於神位前，洗二於東階下，直東霤，北向。盥洗在東，爵洗在西。壘在洗東，加勺。篚在洗西南肆，實以巾。若爵洗之篚，則又實以爵，加坩。執壘、篚者位於其後。

又設揖位於廟南門外。初獻在東，西向。亞、終獻及祝在西，東向，北上。祝位稍却。

開瘞坎於廟內堂下之壬地，方深取足容物，南出陞。設望瘞位於其南。三獻官在南，北向，西上。祝在東，西向。又設三獻官席位於堂下東階東南，西向，北上。設祝席位於庭中，北向。又設祝位於堂上前楹東，西向。

## 省饌

前享一日，享官以下常服，閱饌物，視牲充、膾；詣廚，省鑊視滌漑訖，還齋所。

晡後，掌廟者掃除廟之內外。

## 行事

享日丑前五刻，行事，春、冬用丑時七刻，夏、秋用丑時一刻。行事、執事官各就次。掌饌者帥其屬實饌具畢。贊禮者引初獻凡行事、執事官行止，皆贊禮者引。升自東階，凡行事、執事官升降，皆自東階。點視陳設訖，退，就次，各服祭服。

次引初獻以下詣廟南門外揖位，立定。贊禮者贊揖。次引祝入就堂下席位，北向立。次引三獻官入就堂下席位，西向立。贊禮者詣初獻之右，贊：“請行事。”訖，贊：“再拜。”在位者皆再拜。次引祝升堂，就位立定。執事者瘞血。

次引初獻詣盥洗位，北向立，搯笏，盥手，帨手，執笏，升詣神位前，北向立，搯笏，跪<sup>①</sup>。次引祝詣神位前，西向，搯笏，跪。執事者以幣授祝，祝奉幣，授初獻，執笏，興，退，復位。初獻受幣，奠訖，執笏，俛伏，興，少退，再拜，降，復位。

少頃，引初獻再詣盥洗位，北向立，搯笏，盥手，帨手，執笏。詣爵洗位，北向立，搯笏，洗爵，拭爵，以授執事者，執笏，升堂，詣酌尊所，西向立。執事者以爵授初獻。初獻搯笏，執爵。執尊者舉冪，執事者酌犧尊之泛齊。初獻以爵授執事者，執笏，詣神位前，北向立，搯笏，跪。執事者以爵授初獻，初獻執爵，三祭酒，奠爵，執笏，俛伏，興，少立。次引祝詣神位前，東向，搯笏，跪讀祝文。讀訖，執笏，興，退，復位。初獻再拜，降，復位。

次引亞獻詣盥洗位，北向立，搯笏，盥手，帨手，執笏。詣爵洗位，北向立，搯笏，洗爵，拭爵，以授執事者，執笏，升詣酌尊所，西向立。執事者以爵授亞獻。亞獻搯笏，執爵。執尊者舉冪，執事者酌象尊之醴齊。亞獻授執事者，執笏，詣神位前，北向立，搯笏，跪。執事者以爵授亞獻，亞獻執爵，三祭酒，奠爵執笏，俛伏，興，少退，再拜，降，復位。

次引終獻詣洗及升堂行禮，並如亞獻之儀，降，復位。

贊禮者曰：“賜胙，再拜。”在位者皆再拜。

次引初獻以下就望瘞位。執事者詣神位前，取幣、祝版置於坎。贊禮者曰：“可瘞。”奠土半坎。

引初獻以下詣南門外揖位立。贊禮者贊：“禮畢。”揖訖，退。有司監徹禮饌，闔戶以降，乃退。

<sup>①</sup> 底本“跪”後衍“次引祝詣神位前北向立搯笏跪”十三字，據文津閣本刪。



## 卷第九十七 吉禮

### 皇帝禘享太廟儀一

#### 時日 齋戒 陳設

##### 時日

前期，降御札，以今年孟冬禘享太廟。太常寺帖太史局，於時享前擇日。太史局擇日報太常寺。太常寺參酌訖<sup>①</sup>，申奏，具時日散告。

##### 齋戒

前享十日質明，有司設行事及助祭文武官位於朝堂<sup>②</sup>。太宰、刑部尚書在北，南向，太宰在左，刑部尚書在右。刑部尚書稍却。行事太宰、左丞在南，吏部、戶部、禮部、兵部、工部尚書，吏部、禮部侍郎，大司樂、光祿卿，大樂令、光祿丞，功臣獻官在其南，凡設大樂令以下位皆稍却。執事官又在其南，俱北向，西上。監察御史位二，在西，東向；讀冊、舉冊官，奉禮、協律郎，太祝、郊社、太官令在東，西向，俱北上。奉禮郎以下位皆稍却。設助祭文武百官位於行

① “太常寺”三字，底本脫，據《文獻通考》卷一〇二《宗廟考十二·禘禘》校補。

② “朝堂”，底本作“廟堂”，據文津閣本、十萬卷樓本校改。

事官之南。又設行事、執事及助祭親王、宗室位於太廟齋坊。少宰、刑部侍郎在北，南向，少宰在左，刑部侍郎在右。刑部侍郎稍却。亞、終獻在南，北向，西上。親王及行事、執事、助祭宗室在東，西向，北上。東上閣門、御史臺、太常寺以下分引羣官各就位。凡將引行事、執事、助祭文武官立班，即御史臺引殿中侍御史一員先入就位。太宰讀誓於廟堂，刑部尚書泣之；少宰讀誓於太廟齋坊，刑部侍郎泣之。誓文曰：“今年某月某日孟冬，皇帝祫享太廟<sup>①</sup>。前一日，朝獻景靈宮。各揚其職，其或不恭，國有常刑。”讀訖。內朝堂執事官奉禮郎以下<sup>②</sup>，文官宣德郎以下，武官從義郎以下先退。餘官並對拜訖，退。

皇帝散齋七日於別殿，致齋三日。二日於大慶殿，一日於太廟。凡散齋，不弔喪、問疾、作樂，有司不奏刑殺文書。致齋日，前後殿不視事，唯行享事。

前致齋一日，殿中監帥其屬尚舍舖御座於大慶殿當中，南向；設東西房於御座之左右，稍北；又設西閣及齋室於殿後之左右，殿上前楹施簾。

致齋之日，質明，有司陳法駕鹵簿於宣德門外，尚輦陳平輦於垂拱殿庭。文武百官俱就次，各服其服。東上閣門奏請皇帝未後詣齋室，通事舍人等自下分引知樞密院事以下詣垂拱殿庭，立班。東上閣門附內侍進班齊牌，垂拱殿簾降，皇帝乘輦出，至殿上，少駐。輦官迎駕，自贊常起居。宣輦官上殿，捲簾，鳴鞭，行門禁衛諸班親從迎駕，自贊常起居。次舍人先贊知內侍省官以下常起居，次樞密以下通班常起居，贊“祇候引駕”。樞密、知

① 底本“祫”後衍“祀”字，據《文獻通考》卷一〇二《宗廟考十二·祫禘》刪。

② “執事”，底本作“職事”，據文津閣本校改。

客省事以下，至簽書、東上閣門官分左右立。六尚局應奉官<sup>①</sup>，祇應通侍大夫以下<sup>②</sup>，武功大夫以下，並先退。次管軍臣僚宣名常起居，贊“祇候引駕”，並分左右。前導輦降東階垂拱殿門外，禁衛諸班親從自贊常起居。次行宮使、御營巡檢一班常起居。如通侍大夫以下，知客省事以下，武功大夫以下，知內侍兩省、帶御器械官、充行宮使，御營巡檢，各歸本班。至大慶殿後閣降輦，入西閣，大慶殿簾降。前導官並就次易朝服，詣御榻前分左右侍立。知樞密院事、簽書樞密院事在東，西向，北上；同知樞密院事在西，東向；左輔一員在知樞密院事之北，贊拜東上閣門官一員又在其北，並西向；知客省事以下在簽書樞密院事之南<sup>③</sup>，稍東，西向，北上；簽書客省事以下又在其南，稍却。通事舍人等分引行事、執事、文武助祭官，各績結佩，入詣大慶殿庭立班。次引禮部侍郎奏請中嚴。侍臣詣幄，奉迎內外。符寶郎奉寶先出，陳於御榻之左右。少頃，引禮部侍郎奏外辦。皇帝服通天冠、絳紗袍、績結佩，出西閣乘輿，稱警蹕，侍衛如常儀。由西房至御榻西降輿，皇帝即御座，南向，侍臣夾侍，贊拜東上閣門官於榻前贊：“樞密以下拜。”殿之上下應在位官皆再拜。東上閣門官贊禮訖，轉身北向隨拜訖，面西，贊“各祇候”。次禮直官引左輔詣御座前，俛伏，跪奏：“左輔具官臣某言，請皇帝降座，就齋室。”奏訖，俛伏，興，還侍位。凡左輔奏請准此。皇帝降座，乘輿，由東房入齋室，侍臣各還所司，直衛者如常儀。通事舍人分引行事、執事、文武助祭官以次出。三省、親王、樞密、宗室起居問聖體，並如儀。

應行事、執事、助祭官及從陞者並散齋七日，宿於正寢；致齋

① “六”字，底本脫，據十萬卷樓本校補。

② “通侍”，底本作“通事”，據文津閣本校改。

③ “在”字，底本脫，據文津閣本校補。

三日，各宿於其次。三省、樞密院官各宿於本廳及都堂。侍衛官并尚書、侍郎，分宿於秘書省、中書後省。餘官內庭有所司者各宿於其司。諸方客使許赴倍位者各宿於其次。凡散齋，治事如故，唯不弔喪、問疾、作樂、判書刑殺文書、決罰罪人及與穢惡。致齋之日，官給酒饌。唯享事得行，其餘悉禁。與享之官已齋而闕者，通攝行事。

## 陳設

前享三日，殿中監帥其屬尚舍設大次於太廟東門外道北，南向；小次於阼階東，稍南，西向。儀鸞司設文武侍臣次於大次之前<sup>①</sup>，隨地之宜；行事、助祭官、宗室及有司次於廟之內外。設東方、南方客使次於文官之後，西方、北方客使次於武官之後。設饌幔於廟南門之外，東西相向。每室饌幔各一。設權奉安別廟神主幄次於南神門外，東向。又設七祀次一，於殿下橫街之北道西，東向。配享功臣次於殿下橫街之南<sup>②</sup>，東西相向。每室配享功臣各為一次。

前享二日，宮闈令帥其屬掃除廟之內外，開瘞坎於殿西階之東南，方深足容物，南出陞。太常設七祀燎柴於齋宮內。光祿牽牲詣祠所。太常帥其屬設堂上位，每位並設幄帳，鋪筵，設几。大晟陳登歌之樂於殿上前楹間，稍南，北向；設宮架於庭中，立舞表於鄼綴之間。戶部陳諸州歲貢於宮架南，龜為前列，金次之，玉帛又次之，餘為後，東西相向。

前享一日，奉禮郎、禮直官設皇帝位版於阼階上，飲福位於

① “儀鸞”，底本作“鸞儀”，據文津閣本、《文獻通考》卷九八《宗廟考八·祭祀時享》乙正。

② 底本“南”後衍“道之”二字，據《文獻通考》卷九八《宗廟考八·祭祀時享》刪。

東序，皇子受爵位於飲福位之北，稍東，俱西向。贊者設亞、終獻位於小次南，稍東；助祭親王、宗室、使相在其南；進幣爵酒官、受爵酒官、奉幣官、薦牛俎官、薦籩豆官、薦羊俎豕俎魚俎官、受幣官、壘洗奉爵官、奉瓚槃官、進搏黍官、舉冊官、七祀獻官在助祭宗室、使相之南，並西向，北上。大禮使位於西階之西，稍南；與亞、終獻相對。行事光祿卿、讀冊官、光祿丞、功臣獻官在其西；助祭宰相、使相位在大禮使之南；執政官在其西；又設監察御史位二於西階下，俱東向，北上。奉禮郎、太祝、太官令於東階下，俱西向，北上。協律郎位二，一於殿上前楹間，一於宮架西北，俱東向。大樂令於登歌樂處之北，大司樂於宮架北，良醞令於酌尊所，俱北向。又設助祭文武羣官、宗室位於橫街之南。諸方客使位於廟門之外，隨其方國。

光祿陳牲於東神門外，當門西向，以南爲上。祝史各位於牲後。太常設省牲位於西。大禮使、進幣爵酒官、受爵酒官、奉幣官、受幣官、壘洗奉爵官、奉瓚盤官位於道南，北向，西上。七祀配享功臣獻官在其後。薦牛俎官、薦籩豆官，大司樂、光祿卿，進搏黍官，讀冊、舉冊官，大樂令、光祿丞，奉禮、協律郎，太祝、太官、宮闈令位於道北，南向，西上。大樂令以下位皆稍却。監察御史在薦俎官之右，異位稍却。

光祿設禮饌於東神門外道北，南向。太常設省饌位版於禮饌之南。大禮使、進幣爵酒官、受爵酒官、奉幣官、受幣官、壘洗奉爵官、奉瓚槃官位在南，北向，西上。七祀配享功臣獻官在其後。監察御史位二，在西<sup>①</sup>，東向。薦牛俎官、薦籩豆官，大司樂、

① “二在”二字，底本脫，據文津閣本校補。

光祿卿，進搏黍官，讀冊、舉冊官，大樂令、光祿丞，奉禮、協律郎，太祝、太官、宮闈令位在西，東向<sup>①</sup>，北上。

禮部帥其屬設祝冊案於幄次外之右，司尊彝帥其屬設幣篚於酌尊所。次設籩、豆、簠、簋之位，每位左十有一籩，右十有一豆，俱有四行；加豆二於豆前；登一，在籩、豆間；銅三，在登前；簠一、簋一，在籩、豆外，簠在左，簋在右。設爐炭於幄外，稍前。

設尊彝之位。每位太尊五、山尊五<sup>②</sup>，爲二重，太尊在前，皆有坫，在神位之左；虎彝一在太尊之右，雉彝一在山尊之右，皆有舟，俱加勺、冪，爲酌尊。又設太尊二、山尊二在神位前，著尊二、犧尊二在殿上，象尊二、壺尊六在下，俱北向，西上，加冪，皆設而不酌。

太常設七祀位於殿下橫街之北次內，司命、戶、竈、中雷、門、厲、行。又設配享功臣位於橫街之南次內。韓王趙普、周王曹彬位於橫街之南道西，東向。太師薛居正、太師石熙載、鄭王潘美位在其西，太師李沆、太師王旦、太師李繼隆位又在其西。又設太師王曾、太師呂夷簡、侍中曹瑋位於橫街之南道東，西向。司徒韓琦、太師曾公亮位在其東，次舒王王安石位，次太師蔡確又在其東，俱北上。皆設神位席。太廟設神位版於座首<sup>③</sup>。

司尊彝設祭器。每位左二籩，右二豆，俎一，在神位前；爵一，次之；簠一、簋一，在爵之前，簠在左，簋在右；象尊一，在籩前，加勺、冪。又設俎四、豆二、籩一、簠一、簋一、盤一、篚一於南神門外每室饌幔內。設御洗二於阼階下直東雷，北向。盥洗在東，爵洗在西。壘在洗東，加勺。篚在洗西南肆，實以巾。若爵洗之篚，則

① “在東西向”，底本作“在西東向”，據《文獻通考》卷九八《宗廟考八·祭祀時享》乙正。

② “山尊五”三字，底本脫，據十萬卷樓本校補。

③ “設神”二字，底本脫，據十萬卷樓本校補。

又實以瓚及爵，加坩。設皇帝位於洗南，北向；內侍酌水位於洗東，執巾位於酌水內侍之北，俱西向。奉瓚爵官位於爵洗西，東向。又設亞、終獻盥洗、爵洗於本位之南<sup>①</sup>，太官令盥洗於西階下。七祀配享功臣獻官盥洗於從享神位之前。七祀及配享功臣位前盥洗各一。壘、篚各設於左右。執壘、篚者位其後。

享日丑前五刻，宮闈令開室，帥其屬掃除。太府卿帥其屬入陳幣於篚。篚以白。光祿卿帥其屬入實籩、豆、簠、簋。籩四行，以右爲上。第一行：魚鱸在前，糗餌次之。第二行：乾蓀在前，乾棗、形鹽次之。第三行：鹿脯在前，榛實、乾桃次之。第四行：菱在前，芡、粟次之。豆四行，以左爲上。第一行：芹菹在前，筍菹、葵菹次之。第二行：菁菹在前，韭菹、醢食次之。第三行：魚醢在前，兔醢、豚拍次之。第四行：鹿臠在前，醢醢次之。加豆二，實以稻、雁，稻左，雁右。簠實以稻，簋實以黍，登實以太羹。銅實以羹，加芼滑。良醢令帥其屬入實尊彝。雌彝實以明水，虎彝實以鬱鬯，太尊實以汎齊，山尊實以醴齊，著尊實以盎齊，犧尊實以醴齊，象尊實沉齊，各以一尊實明水。壺尊三實玄酒，三實三酒。明水、玄酒皆在上。又實七祀配享功臣位禮饌。每位左二籩，棗在前，鹿脯次之。右二豆，菁菹在前，鹿臠次之。俎實以羊、豕腥肉<sup>②</sup>。簠實以稷，簋實以黍。爵一、象尊一，實以祠祭法酒。

太常設燭於神位前，又設大禮使以下行事、執事官揖位於東神門外，如省牲之位；設望燎位於瘞坎之南，如省饌之位。所司陳異寶嘉瑞及伐國之寶於宮架之南，東西相向。

① “爵洗”二字，底本脫，據十萬卷樓本校補。

② “俎”字，底本作“菹”，據文津閣本、《文獻通考》卷九八《宗廟考八·祭祀時享》校改。

## 卷第九十八 吉禮

### 皇帝祫享太廟儀二

車駕自景靈宮詣太廟 省牲器  
別廟神主過太廟 晨裸 朝踐

#### 車駕自景靈宮詣太廟

前享一日，皇帝於景靈宮朝獻畢，既還大次。禮部郎中奏解嚴。所司轉仗衛鹵簿。文武助祭官先詣太廟祠所。導駕官以下就次，各服其服。乘黃令進玉輅於昌福門內，南向。設千牛將軍一員位於輅前，北向。門下侍郎一員位於左輔之前，贊者二人位又於其前。

少頃，知客省事以下，知內侍省事以下，帶御器械官、祇應通侍大夫以下，武功大夫以下，六尚局應奉官於齋殿前鬪班立定。東上閣門、御史臺、太常寺分引管軍臣僚及左輔、門下侍郎、太僕卿、乘黃令詣御幄幕殿門外立班，北向，東上。乘黃令位其後。次引導駕官以下在其後，分東西相向立，以候奉迎前導。次引行宮使、御營巡檢等又在其後。禮直官、通事舍人引禮部侍郎奏請中嚴。凡左輔、門下侍郎、禮部侍郎，皆禮直官、通事舍人引。少頃，又奏外辦。皇帝服通天冠、絳紗袍，乘輿以出，稱警蹕，如常儀。行門禁衛、



諸班親從迎駕，奏“聖躬萬福”。次知客省事以下，知內侍省事以下，帶御器械官、祇應通侍大夫以下，武功大夫以下，六尚局應奉官鬪班迎駕，奏“聖躬萬福”。皇帝乘輿，降自西階<sup>①</sup>，稱警蹕，如常儀。管軍臣僚奏“聖躬萬福”。次左輔以下，次導駕官，次行宮使、御營巡檢等逐班奏“聖躬萬福”。該宣名者即宣名。

太僕卿詣玉輅所，攝衣而陞，正立執轡。導駕官前導皇帝至昌福門內玉輅所。千牛將軍前跪執轡。左輔進當御前俛伏，跪奏：“左輔具官臣某言，請皇帝降輿，升輅。”奏訖，俛伏，興，退，復位。凡左輔奏請准此。乘黃令稍前，東向，進玉輅。皇帝降輿升輅，太僕立授綬，導駕官分左右步導。門下侍郎進當門前俛伏，奏：“門下侍郎具官臣某言<sup>②</sup>，請車駕進發。”奏訖，俛伏，興，退，復位。凡門下侍郎奏請准此。車駕動，稱警蹕。左輔先詣昌福門以俟。門下侍郎及贊者夾侍以出。千牛將軍夾輅而趨。車駕將及昌福門，至侍臣上馬所，門下侍郎奏請車駕少駐，敕侍臣上馬。左輔前承旨，退稱曰：“制可。”門下侍郎退，傳制稱：“侍臣上馬。”贊者承傳敕侍臣上馬，諸侍衛之官各督其屬左右翊駕，在黃麾內。符寶郎奉八寶前導，殿中監後部從，導駕官夾侍於前，贊者在左輔、門下侍郎之前。侍臣上馬畢，門下侍郎奏請車駕進發。車駕動，稱警蹕，不鳴鼓吹。

法駕鹵簿前導詣太廟。車駕將近太廟，東上閣門、御史臺分引文武助祭官、宗室、客使，禮直官、贊者引行事、執事俱詣廟西門外立班，再拜奉迎訖，退。內已起居者，止奏“聖躬萬福”。車駕及門少

① “西”字，底本作“兩”，據文津閣本校改。

② “言”字，底本脫，據十萬卷樓本校補。